

Sra. Olinda Rasmijn di Fundacion StimAruba

“Aruba ta manera den un decadencia di nos naturalesa”

ORANJESTAD – “Aruba ta manera den un decadencia di nos naturalesa”, esaki tabata e sentimento expresa pa e activista di medio ambiente sra. Olinda Rasmijn di fundacion Stima Aruba den cuadro di Dia Internacional di Tera conmemora ayera.

E ta haya algo di lamenta cu esunnan cu mester carga e responsabilidad riba e tereno aki no tabata presente den e actividad organisa en conexion cu Dia Internacional di Tera. “E ta parce cu no tin e sentimento pa e naturalesa”, segun sra. Rasmijn.

El a expresa su preocupacion ya cu e decadencia aki ta bisto riba e destruccion cu ta tumando lugha di e mangelnan. E ta un refugio pa e piscanan chikito, y nan mester di nan espacio pa nan pone nan webonan.

Sinembargo e ta mira cu mas y mas tin hendenan cu kier bay kibra e mangelnan. “Esaki ta algo di hopi tristesa cu bo ta tende algo asina aki”, el a bisa. E ta lamenta cu hen-

denan a cuminsa kibra e recursonan natural y ecologico di nos cuminda cu e meta di trece turistanan.

“Mi ta kere cu nos pueblo mester lanta ariba contra esaki pa no traha nada cu ta bini pa kibra nos medio ambiente, pa kibra nos mangelnan...”, segun sra. Rasmijn.

Reflexion

E ta haya cu un dia manera ayera ta nifica cu henter mundo mester ta mas consciente riba e balor di nos “mama tera”. E ta argumenta cu mama tera ta tur cos ya sea biento, lama, aire, pues ayera tabata e dia di medio ambiente, segun sra. Rasmijn.

Sra. Rasmijn den nomber di fundacion StimAruba a wordo invita pa duna un charla organisa pa Biblioteca Nacional conhuntamente cu departamento di Santa Rosa na e seccion Arubiana Caribiana patras di Juliana School. El a papia di e balor di nos mangelnan cu tin den e costanan di Aruba. El a enfoca riba e topico aki pasobra e ta haya cu magelnan ta e recurso di

nos cuminda.

“E ta e comienso di e recurso di nos cuminda cu ta nos piscanan”, el a declara na Bon Dia Aruba. Nos por scucha hopi hende vociferando nan preocupacion pasobra no tin mas pisca na Aruba.

Importancia di nos mangelnan

El a splica cu nos mester ta consciente cu ora e pisca ta asina chikito e mangelnan ta manera un refugio pa nan, unda nan tin un sorto di yerba fini pa come. Tambe e yerba aki ta un cuminda specifico pa e turtuganan. Despues di nueve luna e piscanan ta bay pa e rifnan y despues nan ta bay lama bruto cu ta e piscanan cu e piscadonan ta bin cu nan. Tambe nos parhanan ta bayendo y esunnan tipico ta cabando pa motibo cu nos ta kap nos matanan, y nan di StimAruba ta wak esaki como un tristesa.

El a hala atencion riba e damnan aworaki cu nos ta pasando den un temporada di segura. E ta haya cu si tabatin mas damnan meymey



di e seronan pa coy awa, e lo yuda nos cunukeronan cu a planta. El a tende cu Santa

Rosa kier yuda nan, “pero no tin e awa mas ya cu e awa ta cabando”. □